

之包羞忍辱不能即死以雪此憤者臣罪三也抑此賊之與我邦實萬世不可忘之讐也有血氣者所共憤痛羞戴一天而臣獨與賊混處閱歲經時事矣於心心與迹乖見斤公議蒙被惡名為愛死負國之人此臣之所竊自悲而長痛欲絕者也人臣負茲大戾名行已缺苟怵兇威何所不至律以王章則與屈膝賊庭者相去幾希殺身不足以滅恥臣敢容息於覆載之間冒居峻擢而以貽清朝名器之差乎○夜一更二更有赤氣○乙未○傳于政院曰 天兵三萬先鋒出來已到遼陽不日將到鴨綠糧餉事另加速為措置且我國米糴各司自前知其入而不知其出徒擁虛器今軍資亦若如此則是作一尾鼠雖神運鬼輸而亦不能支矣本監官負自正以下極擇除授勿為遷動事定後別為重賞事議啓言于備邊司○兵曹 啓曰降倭呂汝文勝太善仇老等欲面陳所懷今日臣德馨托見密問則呂汝文以為倭人所忌憚者惟在舟師慶尚左右道舟師各數百隻收聚自左道往右道自右道往左道出沒於金山洋中則賊路中絕金山留屯之賊其勢自孤馬島出來之船亦畏憚而不敢輕進此妙策也日本雖有動兵之奇二三月以後東風始吹其前則決不得出來須趁賊未渡海之前凡百備禦整飭而待之